

URDHËR
Nr. 87, datë 25.7.2013

**PËR PËRBËRJEN, ORGANIZIMIN DHE FUNKSIONIMIN E BORDIT PËR
INFORMACIONIN GJEOPAPËSINOR**

Në mbështetje të pikës 3 të nenit 102 të Kushtetutës dhe të pikës 2 të nenit 10 të ligjit nr. 72/2012 “Për organizimin dhe funksionimin e infrastrukturës kombëtare të informacionit gjeohapësinor”, me propozimin e Ministrit për Inovacionin dhe Teknologjinë e Informacionit e të Komunikimit,

URDHËROJ:

1. Ngritjen e Bordit për Informacionin Gjeohapësinor (BIG).
2. Bordi të kryesohet nga Ministri për Inovacionin dhe Teknologjinë e Informacionit e të Komunikimit dhe në përbërje të tij të ketë këta anëtarë:
 - a) Këshilltarin e Kryeministrit për shoqërinë e informacionit.
 - b) Drejtorin e përgjithshëm të ASIG-ut.
 - c) Drejtorin e Agjencisë Kombëtare të Shoqërisë së Informacionit.
 - ç) Drejtorin e Agjencisë Kombëtare të Planifikimit të Territorit.
 - d) Kryeregjistruesin e Pasurive të Paluajtshme të Republikës së Shqipërisë.
 - dh) Drejtorin e Institutit Gjeografik të Tiranës.
 - e) Drejtorin e Institutit të Statistikave.
 - ë) Drejtorin e Drejtorisë së Përgjithshme të Gjendjes Civile.
 - f) Drejtorin e përgjithshëm të Agjencisë së Legalizimit, Urbanizimit dhe Integritimit të Zonave/Ndërtimeve Informale;
 - g) Një përfaqësues të Ministrisë së Financave;
 - gj) Një përfaqësues të Ministrisë së Bujqësisë, Ushqimit dhe Mbrojtjes së Konsumatorit;
 - h) Një përfaqësues të Ministrisë së Mjedisit, Pyjeve dhe Administrimit të Ujërave;
 - i) Një përfaqësues të Ministrisë së Ekonomisë, Tregtisë dhe Energjetikës;
 - j) Një përfaqësues nga Komisioni Qeveritar i Tokës;
 - k) Një përfaqësues i Agjencisë së Kthimit dhe Kompensimit të Pronave;
 - l) Shefin e Departamentit të Gjeodezisë të Fakultetit të Inxhinierisë së Ndërtimit;
 - ll) Një përfaqësues të Shoqatës së Bashkive;
 - m) Kryetarin e Shoqatës së Inxhinierëve Gjeodetë, të licencuar.
3. Fusha e veprimtarisë së bordit të jetë këshillimi dhe formulimi i mendimeve e propozimeve lidhur me:
 - a) zhvillimin e politikës kombëtare për infrastrukturën e të dhënave gjeohapësinore;
 - b) përmirësimin dhe plotësimin e legjislacionit në fuqi për infrastrukturën kombëtare të të dhënave gjeohapësinore;
 - c) zhvillimin dhe përmirësimin e teknologjisë në fushën e informacionit gjeohapësinor;
 - ç) përcaktimin e temave të tjera sipas parashikimeve të këtij ligji;
 - d) vendimet e ASIG-ut për mbledhjen, përpunimin dhe/ose përditësimin e të dhënave gjeohapësinore nga autoritetet publike sipas temave përkatëse;
 - dh) përcaktimin e standardeve shtetërore dhe rregullave uniforme për krijimin e sistemeve të informacionit gjeohapësinor, për secilën temë;
 - e) rregullat e hartuara nga ASIG-u për krijimin, përditësimin, shkëmbimin, aksesin dhe përdorimin e grupeve të të dhënave gjeohapësinore, shërbimeve të të dhënave gjeohapësinore dhe metadatave;
 - ë) rregullat e hartuara nga ASIG-u për realizimin e ndërveprueshmërisë;
 - f) përcaktimin e kushteve që lidhen me krijimin e GIS kombëtar;

g) përcaktimin e rregullave për aksesin dhe shkëmbimin e informacionit gjeohapësinor nga subjektet publike dhe private;

gj) nismat e institucioneve publike në fushën e informacionit gjeohapësinor;

h) përcaktimin e rregullave teknike dhe të administrimit të Gjeoportail-it;

i) çdo çështje tjetër që lidhet me infrastrukturën e të dhënave gjeohapësinore.

4. Bordi për Informacionin Gjeohapësinor, në varësi të tematikës që shqyrton, fton në mbledhjet e tij ekspertë të fushave të ndryshme.

5. Bordi për Informacionin Gjeohapësinor e ushtron veprimtarinë e tij në përputhje me rregulloren e brendshme “Për organizimin dhe funksionimin e Bordit për Informacionin Gjeohapësinor”, që i bashkëlidhet këtij urdhri dhe është pjesë përbërëse e tij.

6. Ngarkohen Ministri për Inovacionin dhe Teknologjinë e Informacionit e të Komunikimit dhe Bordi për Informacionin Gjeohapësinor për zbatimin e këtij urdhri.

Ky urdhër hyn në fuqi menjëherë.

KRYEMINISTRI

Sali Berisha

RREGULLORE E BRENDSHME

PËR ORGANIZIMIN DHE FUNKSIONIMIN E BORDIT PËR INFORMACIONIN GJEOHAPËSINOR

Neni 1

Objekti

Objekti i kësaj rregulloreje është përcaktimi i rregullave të organizimit dhe të funksionimit të Bordit për Informacionin Gjeohapësinor (BIG).

Neni 2

Përkufizime

Në kuptim të kësaj rregulloreje:

a) “BIG” ka të njëjtin kuptim me atë të dhënë nga neni 3 paragrafi 3 i ligjit nr. 72/2012 “Për organizimin dhe funksionimin e infrastrukturës kombëtare të informacionit gjeohapësinor në Republikën e Shqipërisë”.

b) Ligji për infrastrukturën kombëtare të informacionit gjeohapësinor është ligji nr. 72/2012 “Për organizimin dhe funksionimin e infrastrukturës kombëtare të informacionit gjeohapësinor në Republikën e Shqipërisë”.

c) “Autoriteti publik” ka të njëjtin kuptim me atë të dhënë nga neni 3 paragrafi 2 i ligjit nr. 72, datë 28.6.2012 “Për organizimin dhe funksionimin e infrastrukturës kombëtare të informacionit gjeohapësinor në Republikën e Shqipërisë”.

ç) “ASIG” ka të njëjtin kuptim me atë të dhënë nga neni 3 paragrafi 1 i ligjit nr. 72/2012 “Për organizimin dhe funksionimin e infrastrukturës kombëtare të informacionit gjeohapësinor në Republikën e Shqipërisë”.

d) “Ministri” ka të njëjtin kuptim me atë të dhënë nga neni 3 paragrafi 20 i ligjit nr. 72/2012 “Për organizimin dhe funksionimin e infrastrukturës kombëtare të informacionit gjeohapësinor në Republikën e Shqipërisë”.

Neni 3

Mbledhja e BIG-ut

1. BIG-u diskuton dhe merr vendimet e nevojshme nëpërmjet mbledhjeve të tij. Mbledhja e BIG-ut është takimi zyrtar i anëtarëve të tij.

2. BIG-u mbledhet si rregull në mbledhje të zakonshme jo më pak se 4 herë në vit. Në raste të veçanta, mbledhja e BIG-ut thirret jashtë radhe, me kërkesën e motivuar të kryetarit të BIG-ut ose të 5 anëtarëve të tij.

3. Njoftimi për vendin, kohën e mbledhjes, rendin e ditës, si dhe materialet që do të shqyrtohen, u dërgohen anëtarëve të BIG-ut të paktën gjashtë ditë përpara datës së mbledhjes.

4. Mbledhjet e BIG-ut thirren dhe drejtohen nga kryetari i BIG-ut, dhe në mungesë të tij, nga njëri prej anëtarëve të autorizuar prej tij.

5. Mbledhjet e BIG-ut zhvillohen kur janë të pranishëm më shumë se 2/3 e anëtarëve. Në mbledhje marrin pjesë kryetari, anëtarët dhe të ftuarit sipas rastit dhe sekretariati teknik i BIG-ut.

6. Mbledhjen e BIG-ut e hap dhe e drejton kryetari. Në fund të mbledhjes, kryetari deklaron mbylljen e saj dhe kur një ose disa çështje të rendit të ditës nuk arrijnë të shqyrtohen brenda ditës së mbledhjes, ai vendos vazhdimin e mbledhjes në një ditë tjetër.

7. Kryetari i BIG-ut ushtron këto të drejta dhe përgjegjësi:

- a) thërret dhe drejton mbledhjet e BIG-ut;
- b) cakton rendin e ditës së mbledhjeve të BIG-ut në bashkëpunim me drejtorin e ASIG-ut;
- c) kujdeset që drejtimi i BIG-ut të jetë në përputhje me ligjin nr. 72/2012 “Për organizimin dhe funksionimin e infrastrukturës kombëtare të informacionit gjeohapësinor në Republikën e Shqipërisë”.

Neni 4

Përgatitja e materialeve dhe mënyra e paraqitjes së tyre

Përgatitja e materialeve, që do të merren në shqyrtim në mbledhjen e BIG-ut, do të bëhet nga sekretariati teknik i BIG-ut në përputhje të plotë me parashikimet e nenit 16 të rregullores së brendshme “Për organizimin dhe funksionimin e Autoritetit Shtetëror për Informacionin Gjeohapësinor”.

Neni 5

Procedura e marrjes së vendimit për mendimin e shprehur

1. BIG-u shpreh mendim për materialet e paraqitura, kur në mbledhjen e tij janë të pranishëm më shumë se 2/3 e anëtarëve.

2. Mendimi i shprehur duhet të mbështetet nga shumica e thjeshtë e votave të anëtarëve të pranishëm. Në rast votash të barabarta, vota e kryetarit të mbledhjes është përcaktuese.

3. Votimi bëhet me gojë ose me ngritje dore. Gjatë votimit nuk lejohen abstenime.

4. Në rastin kur një anëtar i BIG-ut ose pjesëtarë të familjes së tij kanë lidhje interesash të drejtpërdrejta ose të tërthorta me çështjen që trajtohet në mbledhje, ai detyrohet të deklarojë interesat e tij që në fillim të diskutimit dhe nuk merr pjesë në votim.

5. Në raste të veçanta, urgjente dhe tepër të rëndësishme, kryetari i BIG-ut mund të miratojë shprehjen e mendimit edhe pa u mbledhur BIG-u, por për këto raste, duhet të shprehin mendimin e tyre edhe minimumi 5 anëtarë të BIG-ut. Kryetari porosit marrjen e një vendimi qarkullues, i cili nënshkruhet më pas nga të gjithë anëtarët e BIG-ut që e miratojnë këtë vendim.

Neni 6

Dokumentimi i mbledhjeve

Dokumentimi i mbledhjeve të BIG-ut të bëhet nga sekretariati teknik i BIG-ut në përputhje të plotë me parashikimet e nenit 16 të rregullores së brendshme “Për organizimin dhe funksionimin e Autoritetit Shtetëror për Informacionin Gjeohapësinor”.

Neni 7
Dispozita të fundit

Vlerësimet dhe debatet që zhvillohen gjatë shqyrtimit të materialeve të paraqitura dhe marrjes së vendimeve në mbledhjet e BIG-ut janë konfidenciale.